

Aningaasanut tunngasumik ingerlatsivimmik (finansiel virksomhed), tassannga aningaasaateqarfik, sillimmasiisarfik, soraarnerussutisiaqarfik kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigissaattut siunnersuut. Nalunaarusiaq UKA2026 aallartinginnerani Inatsisartunut agguanneqassaaq. (Inatsisartuni eqimattak, Naleraq)

Aappassaaneernerani oqaaseqaat:

Siullermik Inuussutissarsiornermut Aatsitassanullu Ataatsimiititaliaq suliaqarsimaneranut qujavugut. Minnerunngitsumillu Inuit Ataqtigiit, Siumut siullermeernerani oqaaseqaataannut, tapersiisumut qujanaq. Tullertut aamma ataatsimiisitaliap isumaliuutissiissut suliareqqaarmassuk Naalakkersuisut allannguutissatut siunnersuutaannut, taannalu Naleqqamiit tapersikutsoorsinnaavarput.

Naleqqamiit siunnersuut soorunami suli tamakkiisumik taperserparput, Naalakkersuisut soorunami piffissaliussaata nutaaq paasilluarlugu kinguartinneqartariaqartoq UKA 2027- mut.

Siunnersuut una pingaaruteqartorujussuuvoq.

Uani eqqartunngilarput sillimmasiinerit kisiisa.

Uani eqqartorparput aningaasaatigut.

Uani eqqartorparput siunissarput.

Uani eqqartorparput Nunarput nammineq qanoq aningaasatigut imminut napatissinnaassanersoq.

Siullermeerinninnermi oqaatigeriikkattuut, ukiut tamaasa oqaluffigineqartarpugut:

“Naalagaaffinngorsinnaanngilasi.”

“Bloktilskud annaassavarsi.”

“Danmarki qimappassi ajornartorsiulissaasi.”

“Allat aningaasatigut aqussavaasi.”

Kisianni ullumikkut apequt pingarneq tassaavoq:

Sooruna aningaasaatigut nammineq aqunngikkigut?

Sooruna aningaasaliissuterpasuagut nunatsinni iluaqutaanatik, nunanut allanut iluaqutaanersut?

Maanna paasisutissat amerlanerusut pigilersimavagut.

§ 37 aqqutigalugu paasivarput:

- Namminersorlutik Oqartussat sillimmasiinernut 12 million koruunit sinnerlugit akiliuteqartartut,
- Namminersorlutik Oqartussat ingerlatseqatigiiffii 109 million koruunit missaanik akiliuteqartartut,
- kommunit 35 million koruunit missaannik akiliuteqartartut,
- aammalu AES-imut (*Arbejdsmarkedets Erhvervssikring*) 26 million koruunit sinnerlugit akiliuteqartoqartartoq.

Tamakkua katikkaanni minnerpaamik 200–250 million DKK ukiumut nunatsinniit aniasarput.

Kisianni taakkua kisiisa pinnagit.

Bankit iluanaarutaat, pensioninut katersat, erniallu ilanngullugit naatsorsoraanni, Nunarput ukiumut **700 mio. 1 milliard DKK** tungaanut annaasaqartarpoq.

Tamanna inuiaqatigiinnut ikittunnguusunut annertuupilussuuvoq.

Ajornartorsiut annerpaaq tassaavoq aningaasat taakku nunatsinni iluaqutaanatik allanut iluaqutaammata.

AES nammineq uppernarsarpaa nunatsinni ataasiinnannguamilluunniit aningaasaliineq ajorlutik.

Kalaallit Nunaanni sulisut akiliutaat Danmarkimi obligationinut atorneqartarput.

Taamaappoq.

Kalaaleq sulisartoq akiliigaangat, aningaasat nunatsinniit annissuunneqarput.

Kalaaleq pensionimut ileqqaaraangat, aningaasat nunatsinni inissialiornermut atorneqanneq ajorput.

Kalaaleq bankimut ileqqaaraangat, iluanaarutit annerpaartaat allanut iluaqutaasarput.

Sooruna Demokraatit, Atassut, attaviittullu tamakkua akueriinnaraat? Ataatsimiisitaliami utoqqatsissutersi ikkappallaarujussuarpoq.

Ullumikkut nunatsinni inissianik amigaateqarpugut.

Inuussutissarsiornermut aningaasaliissutissanik amigaateqarpugut.

Nunaqarfinni ineriartortitsinissamut aningaasaliissutissanik amigaateqarpugut.

Aqqusinernut, umiarsualivinnut, nukissiornermut aningaasaliissutissanik amigaateqarpugut.

Kisianni taamaakkaluartoq aningaasaatigut annertoorujussuit nunanut allanut annissuuppagut.

Eqqarsaatigilaarsiuk.

Ukiut qulit ingerlaneranni aningaasat taakku nunatsinni atorneqarsimasuuppata:

- inissiarpassuit sanaartorneqarsinnaagaluarput,
- ilinniarfiit nutaat pilersinneqarsinnaagaluarput,
- nukissiuutit imminut akilersinnaasut pilersinneqarsinnaagaluarput,
- inuussutissarsiornermut aningaasalersuinerit annertusarneqarsinnaagaluarput.

Kisianni D, A, attaviittorlu taamaaliorumangillat, Naleqqamiilli soorunami suli ilaserivatsigit, neriuppugut isumarsi Nunarput pillugu allanngorsinnaassagissi.

Aningaasaatigut allanut sullissipput.

Aningaasaatigut allanut sullissipput.

Tupigusuutigaarput maanna ilaat oqarmata nalunaarussiaq pisariaqanngitsoq, suliffeqarfimmik aningaasaqarnermut tunngasumik pilersitsisoqarsinnaareermat.

Kisianni siunnersuutip qulequtaa tassunga tunnganngilaq.

Naleraq oqanngilaq aningaaserivimmik pilersitsisoqarsinnaanngitsoq.

Apequt pingaarneq tassaavoq:

Qanoq ililluta nunatsinni nammineq aningaasatigut nunatsinni inerisaatissavagut?

Qanoq ililluta aningaasaatigut nunatsinni kaaviiartissinnaavagut?

Qanoq ililluta nunatsinni nammineq aningaasaqarnikkut tunngaviliisinnaavugut?

Taama pisariitsigisimappat, sooruna maannamut:

- nunatsinni sillimmasiisarfimmik nammineq pigisaqanngitsugut?
- nunatsinni pensioneartitsivimmik nammineq aqunneqartumik peqanngitsugut?
- imaluunniit ineriartortitsinermut aningaaseriveqanngitsugut?

Taamaammanuna nalunaarussiaq pisariaqartoq.

Aamma Naalackersuisut namminneq uppersarparaat sillimmasiinernut akiliutit nunatsinnit aniasartut annikillisarmissaat kissaatigalugu.

Tamanna pitsaasuvoq.

Kisianni paasissutissanik amerlanerusunik pisariaqartitsivugut.

Nunatta aningaasatigut imminut napatikkiartuinnarnissaa kissaatigigutsigu, taava aningaasatigut atortulersuutivut nammineq eqqarsaatigalugit pilersaarusiortuta aallartittariaqarpugut.

Naleqqamiit piumasarinngilarput pisortat ingerlaannaq aningaaserivinnik ingerlatsissasut.

Kisianni misissorneqartariaqarput:

- nammineq sillimmasiisarnerit,
- aningaasaliinermut fondit,
- pensioneartitsiviit,
- ineriartortitsinermut aningaaseriviit,
- aammalu periarfissat allat nunatsinni aningaasaatinik nunatsinniiginnartitsisinnaasut.

Nunat allat mikisut tamanna ingerlareerpaat.

Island taamatut ingerlatsivoq.

Savalimmiut taamatut ingerlatsipput.

Nunat allat avannarliit taamaaliorput.

Soormi taava Nunatsinni aningaasatigut allanut sullissitissavagut?

Ataqqinartut Inatsisartut,

Aningaasatigut imminut napatinneq oqaasiinnarmik pilersinnaviangilagut.

Pilersaarusiornikkut pinngortarpoq.

Aningaasatigut aqutsinikkut pinngortarpoq.

Siunissamut isiginninnikkut pinngortarpoq.

Ullumikkut aningaasaatigut allanut nassiuttarpagut - kingornalu ernialerlugit utertillugit attartortariaqartarlugit.

Tamanna siunissamut eqqanaarinnerunnerunngilaq.

Naleqqamiit isumaqarpugut nalunaarusiaq pisariaqarluinnartoq.

Paasissutissat ulorianangillat.

Killormut

Nalunaarusiaq Inatsisartut aalajangiinissaannut pitsaasumik tunngaviliisussaavoq.

Taamaattumik siunnersuut suli tamakkiisumik taparserparput aammalu Inatsisartut kaammattorlugit akuersissuteqaqqullugit.

Aningaasaatigut Nunatsinni annerpaamik sulisariaqarput.

Qujanaq.